

S A D R Ź A J

"Službenog glasnika Grada Gradačac" broj 1/19

AKTI GRADSKOG VIJEĆA SA KONSTITUIRAJUĆE SJEDNICE OD 11. 06. 2019. godine

1. Statutarna odluka o organizaciji Grada Gradačac u skladu sa Zakonom o Gradu Gradačac 1
2. Odluka o pečatu Grada Gradačac 5



Službeni glasnik

GRADA GRADAČAC

Službeni glasnik izlazi po potrebi	BROJ 01 / 2019 GRADAČAC 11.06.2019.god.	"Službeni glasnik" izdaje Gradsko vijeće Gradačac. Za izdavača: Šakić Enir, prof. predsjedavajući Gradskog vijeća. Štampa: "EKEprint" Gradačac
---------------------------------------	--	--

1.

Na osnovu člana 9. Zakona o Gradu Gradačac («Službene novine Federacije Bosne i Hercegovine», broj 30/19) i u skladu s Odlukom o proglašenju Grada Gradačac («Službeni glasnik Općine Gradačac», broj 1/17), Gradsko vijeće Grada Gradačac, na konstituirajućoj sjednici, od 11.06.2019. godine, donosi

STATUTARNU ODLUKU
o organizaciji Grada Gradačac u skladu sa
Zakonom o Gradu Gradačac

I OPĆE ODREDBE**Član 1.**

Ovom Odlukom se privremeno, u skladu sa Zakonom o gradu Gradačac (u daljem tekstu: Zakon) do donošenja Statuta Grada Gradačac, utvrđuju gradski organi, način njihovog rada i druga pitanja od značaja za organizaciju, status i obilježja Grada Gradačac.

Član 2.

Grad Gradačac obuhvaća područje dosadašnje općine Gradačac utvrđeno Zakonom o područjima opština u SR BiH («Sl. list SR BiH», broj 47/62, 6/65 i 35/77) i Zakonom o utvrđivanju naseljenih mjesta i o izmjenama u nazivima naseljenih mjesta u određenim općinama-prečišćeni tekst («Sl. novine Federacije BiH», broj 14/04., 59/05., 68/05 i 81/11), odnosno prema evidenciji Federalnog zavoda za statistiku koja su se nalazila u okviru Općine Gradačac.

Član 3.

Grad ima svojstvo pravnog lica.
Sjedište Grada je u Gradačcu, ulica H.K.
Gradašćevića br. 54.

Član 4.

Grad preuzima zastavu, grb i druga obilježja Općine Gradačac.

II ORGANI GRADA**Član 5.**

Organi Grada su Gradsko vijeće i Gradonačelnik, koji svoju funkciju vrše u skladu s Ustavom Bosne i Hercegovine, Ustavom Federacije Bosne i Hercegovine, Ustavom Tuzlanskog kantona, zakonom, Statutom i ovom Odlukom.

1. Gradsko vijeće**Član 6.**

Gradsko Vijeće u okviru svojih nadležnosti:

1. donosi Statut Grada dvotrećinskom većinom glasova;
2. donosi odluke i druge opće akte kojima uređuje pitanja iz samoupravnog djelokruga Grada;
3. donosi Budžet Grada, godišnji izvještaj o izvršenju Budžeta kao i odluku o privremenom finansiranju u skladu sa Zakonom;
4. utvrđuje gradsku politiku u okviru nadležnosti Grada i prati njeno ostvarivanje;
5. donosi razvojne, prostorne i urbanističke planove i programe, te provedbene planove, uključujući zoniranje;
6. donosi propise o porezima, taksama, naknadama i doprinosima Grada u skladu sa zakonom;
7. donosi odluke o upravljanju i raspolaganju imovinom Grada;
8. donosi odluke o zaduživanju Grada, o raspisivanju javnog zajma i davanju jamstva u skladu sa zakonom;
9. donosi programe uređenja gradskog građevinskog zemljišta;
10. donosi plan korištenja javnih površina;
11. donosi odluke o organizaciji mjesne samouprave i nazivima ulica, trgova i naseljenih mjesta;
12. donosi odluke o udruživanju Grada u saveze i druge oblike organizovanja, donosi odluke o

12. donosi odluke o udruživanju Grada u saveze i druge oblike organizovanja, donosi odluke o programu saradnje, načinu saradnje i realizaciji posjete te uspostavljanju prijateljske i druge saradnje s lokalnim i regionalnim zajednicama drugih država;
13. donosi odluke o proglašenju značajnih datuma Grada;
14. donosi odluke o priznanjima i nagradama Grada;
15. donosi odluke o raspisivanju referenduma;
16. bira i razrješava predsjedavajućeg i zamjenika predsjedavajućeg Gradskog vijeća;
17. osniva radna tijela Gradskog vijeća te bira i razrješava njihove članove;
18. imenuje Gradskog pravobranioca i zamjenika Gradskog pravobranioca;
19. imenuje, bira i razrješava druge osobe određene zakonom, Statutom i odlukama, te daje saglasnost na imenovanja, izbor i razrješanja kada je to propisano;
20. osniva stručnu službu Gradskog vijeća;
21. osniva preduzeća i ustanove i druga pravna lica za obavljanje komunalnih, društvenih, privrednih i drugih djelatnosti od interesa za Grad, te odlučuje o njihovim statusnim promjenama u skladu sa zakonom;
22. odlučuje o prestanku rada ustanova i drugih pravnih lica u skladu sa zakonom;
23. odlučuje o prijenosu i preuzimanju osnivačkih prava u skladu sa ovim Statutom;
24. razmatra godišnji izvještaj o provođenju gradske politike i aktivnostima Gradonačelnika;
25. pokreće i razmatra inicijativu za pokretanje postupka opoziva Gradonačelnika i donosi odluke o pokretanju postupka opoziva Gradonačelnika;
26. ocjenjuje rad javnih ustanova i javnih preduzeća i kvalitet usluga u djelatnosti zdravstva, socijalne zaštite, obrazovanja, kulture i sporta, najmanje jednom godišnje, te osigurava finansijska sredstva za unapređenje njihovog rada i kvaliteta usluga u skladu sa potrebama stanovništva i mogućnostima Grada;
27. donosi pojedinačne i druge akte iz samoupravnog djelokruga u skladu sa zakonom i Statutom;
28. analizira stanje javnog reda i mira, sigurnost ljudi i imovine najmanje jednom godišnje, te predlaže mjere prema nadležnim organima;
29. donosi Poslovnik o svom radu;
30. obavlja i druge poslove utvrđene zakonom i Statutom.

Gradsko vijeće ima 30 vijećnika (trideset vijećnika), od kojih se jedan vijećnik bira iz reda pripadnika nacionalnih manjina.

Članovi Gradskog vijeća odgovaraju za ustavnost i zakonitost akata koje Gradsko vijeće donosi u okviru svoje nadležnosti.

1. Gradonačelnik

Član 7.

Izvršni organ Grada je Gradonačelnik.

Gradonačelnik u okviru svoje nadležnosti:

1. predstavlja i zastupa Grad;
2. osigurava izvršavanje odluka i drugih akata Gradskog vijeća i odgovoran je za njihovo provođenje;
3. podnosi prijedlog Budžeta Grada Gradskom vijeću;
4. odgovoran je za izvršavanje Budžeta Grada;
5. obavlja upravljački nadzor nad zakonitošću rada javnih ustanova i preduzeća kojim je osnivač Grad, te im daje upute za rad;
6. donosi akte iz svoje nadležnosti;
7. predlaže odluke i druge akte Gradskom vijeću;
8. obezbjeđuje izradu i Gradskom vijeću podnosi na usvajanje ekonomske planove, razvojne planove, investicione programe, prostorne i urbanističke planove i ostale planske i regulatorne dokumente koji se odnose na korištenje i upravljanje zemljištem, uključujući zoniranje i korištenje javnog zemljišta;
9. provodi politiku Grada u skladu sa odlukama Gradskog vijeća;
10. izvršava zakone i druge propise čije je izvršavanje povjereno Gradu;
11. utvrđuje organizaciju službi za upravu i drugih službi Grada;
12. donosi Pravilnik o unutrašnjoj organizaciji gradskih službi;
13. realizira saradnju Grada sa drugim općinama, gradovima, međunarodnim i drugim organizacijama u skladu sa odlukama i zaključcima Gradskog vijeća i njegovih radnih tijela;
14. podnosi izvještaj Gradskom vijeću o ostvarivanju politike Grada i svojim aktivnostima;
15. odlučuje o pitanjima iz radnog odnosa zaposlenika u skladu sa zakonom;
16. brine se o zakonitom i provedbenom obavljanju poslova iz nadležnosti gradskih službi i poduzima mjere za osiguravanje njihovog efikasnijeg rada;
17. zaključuje ugovore i druge pravne poslove u skladu sa zakonom, Statutom i odlukom Gradskog vijeća;
18. brine se o urednom i pravilnom korištenju imovine i sredstava rada;
19. obavlja i druge poslove utvrđene zakonom, drugim propisima i Statutom.

Gradonačelnik odgovara za ustavnost i zakonitost akata, koje donosi, odnosno predlaže Gradskom vijeću.

Član 8.

Međusobni odnosi Gradskog vijeća i Gradonačelnika se zasnivaju na principima međusobnog uvažavanja i saradnje, uz pojedinačnu odgovornost za ostvarivanje vlastitih nadležnosti i zajedničku odgovornost za funkcionisanje Grada.

III MJESNA SAMOUPRAVA

Član 9.

Mjesna samouprava u Gradu se ostvaruje u mjesnoj zajednici, kao obaveznom obliku mjesne samouprave koju Gradsko vijeće osniva svojom odlukom, u skladu sa zakonom i Statutom Grada.

Član 10.

Gradani u mjesnim zajednicama, putem organa mjesne zajednice, odlučuje o poslovima od značaja za rad mjesne zajednice, a naročito:

pokreću i učestvuju u javnoj raspravi kod pripreme i donošenja urbanističkih planova na području mjesne zajednice; pokreću inicijative, daju mišljenja i učestvuju u izgradnji komunalnih objekata i objekata u općoj upotrebi; pokreću i učestvuju u raspravama o inicijativama i aktivnostima za razvoj privrede i društvenih djelatnosti; brinu se o zaštiti osoba kojima je potrebna pomoć i u tu svrhu pokreću saradnju sa stručnim organima iz oblasti socijalne zaštite; staraju se o razvoju kulture i sporta i stvaraju uvjete za dostupnost ustanova i objekata kulture i sporta svim građanima, a pogotovu mladim; stvaraju uvjete i preduzimaju mjere za očuvanje prirodnih i radom ostvarenih vrijednosti čovjekove sredine i učestvuju u drugim poslovima utvrđenim Statutom i pravilima mjesne zajednice, vodeći računa o vrsti i obimu potreba i raspoloživim sredstvima, kao i interesima građana u cjelini.

Član 11.

Mjesna zajednica ima svojstvo pravnog lica u okviru prava i dužnosti utvrđenih Statutom i Odlukom o osnivanju.

IV GRADSKJE SLUŽBE ZA UPRAVU, STRUČNE I DRUGE SLUŽBE

Član 12.

Poslovi lokalne samouprave i uprave iz djelokruga Grada kao i poslove uprave koje su viši nivoi vlasti prenijeli na Grad, obavlja jedinstveni gradski organ

državne službe, na način utvrđen Ustavom, zakonom ili drugim propisom. Jedinstvenim organom uprave rukovodi Gradonačelnik.

Član 13.

U okviru gradskog organa državne službe formiraju se gradske službe za upravu. Gradske službe za upravu u okviru prava i dužnosti Grada izvršavaju zakone i druge propise, odluke i druge opće akte Gradskog vijeća, Gradonačelnika, prate stanje u upravnim oblastima za koje su obrazovane, rješavaju u upravnim stvarima, provode nadzor, poduzimaju mjere za koje su zakonom ili drugim propisom ovlaštene, pripremaju odluke i opće akte te obavljaju druge poslove iz okvira svoje nadležnosti.

V PRELAZNE I ZAVRŠNE ODREDBE

Član 14.

Općinsko vijeće Gradačac i radna tijela Općinskog vijeća Gradačac, konstituisani nakon općinskih izbora 2016. godine, nastavljaju s radom kao Gradsko vijeće i radna tijela Gradskog vijeća sa nadležnostima utvrđenim Statutom, Poslovnikom i ovom Odlukom, sve do okončanja prvih narednih izbora u skladu sa Zakonom.

Vijećnici iz prethodnog stava ovog člana će održati konstituirajuću sjednicu (posebnu sjednicu Gradskog vijeća).

Na konstituirajućoj sjednici će se prvo pročitati imena vijećnika na općinskim izborima 2016. godine i/ili onih kojima je Centralna izborna komisija dodijelila mandat sukladno odredbama Izbornog zakona Bosne i Hercegovine do dana održavanja sjednice iz prethodnog stava ovog člana.

Na konstituirajućoj sjednici vijećnici će položiti svečanu izjavu sljedeće sadržine:

«Svečano izjavljujem da ću poverenu dužnost obavljati savjesno i odgovorno, da ću se pridržavati Ustava i zakona Bosne i Hercegovine, Federacije Bosne i Hercegovine i Tuzlanskog kantona, te Statuta Grada Gradačac i Etičkog kodeksa, zalagati se za ljudska prava i slobode i da ću u svim prilikama štiti interese Bosne i Hercegovine, Federacije Bosne i Hercegovine, Tuzlanskog kantona i Grada Gradačac kao i ravnopravnost naroda i građana koji u njima žive».

Tekst svečane izjave iz prethodnog stava ovog člana, primjenjivati će se u slučaju kada nakon prestanka mandata Centralna izborna komisija Bosne i Hercegovine, dodijeli mandate slijedećem vijećniku sa liste nakon općinskih izbora 2016. godine.

Član 15.

Na rad Gradskog vijeća i njegovih radnih tijela, primjenjivat će se odredbe važećeg Poslovnika Općinskog vijeća Gradačac i odredbe poslovnika radnih tijela, ako nisu u suprotnosti sa odredbama Zakona o Gradu Gradačac i odredbama ove Odluke. Eventualna sporna pitanja, koja nisu uređena Poslovníkom iz prethodnog stava ovog člana, regulisat će se zaključkom Gradskog vijeća na sjednici na kojoj se pojavi sporno pitanje.

Član 16.

Osobe izabrane ili imenovane od strane Općinskog vijeća, nastavljaju s radom u Gradu Gradačac do isteka mandata na koji su izabrani ili imenovani, osim ukoliko ne podnesu ostavku ili budu razriješeni na način i po postupku propisanim zakonom.

Član 17.

Načelnik Općine Gradačac, neposredno izabran na općinskim izborima 2016. godine, nastavlja sa radom kao Gradonačelnik s nadležnostima utvrđenim ovom Odlukom sve do okončanja prvih narednih neposrednih izbora za Gradonačelnika u skladu sa Zakonom.

Član 18.

Općinske službe za upravu i drugi općinski organi i službe (u daljem tekstu: općinski organi) nastavljaju sa radom, kao gradske službe za upravu i drugi gradski organi i službe (u daljem tekstu: gradski organi) prema djelokrugu utvrđenom Odlukom o organizaciji i djelokrugu općinskih organa uprave i drugih tijela općinske uprave i samouprave općine Gradačac ("Službeni glasnik Općine Gradačac" broj 5/12, 4/14 i 4/15) i drugim općinskim propisima, ukoliko se u skladu sa zakonom ne donese drugačija odluka.

Poslove, arhivu, dokumentaciju, kao i službenike i namještenike općinskih organa iz stava 1. ovog člana, preuzimaju gradski organi.

Član 19.

Drugi općinski organi osnovani na osnovu posebnog Zakona, nastavljaju sa radom kao gradski organi.

Član 20.

Općinska javna preduzeća i općinske javne ustanove nastavljaju sa radom kao gradska javna preduzeća i gradske javne ustanove.

Na osnovu ove Odluke će se izvršiti promjena imena osnivača u sudskom registru i usaglašavanje akata istih.

Član 21.

Postojeći organi mjesnih zajednica nastavljaju s

radom do izbora novih organa mjesne zajednice, na način i postupku utvrđenim Statutom Grada i općim aktima mjesne zajednice.

Član 22.

Najkasnije u roku od šest mjeseci od dana stupanja na snagu ove Odluke, Gradsko vijeće će donijeti Statut Grada.

Do donošenja Statuta Grada će se primjenjivati odredbe Statuta Općine Gradačac ("Službeni glasnik Općine Gradačac", broj 4/08, 5/12, 1/17, 5/18 i 8/18), koje nisu u suprotnosti sa Zakonom o Gradu Gradačac ("Službene novine Federacije Bosne i Hercegovine", broj: 30/19), Zakonom o principima lokalne samouprave u Federaciji Bosne i Hercegovine ("Službene novine Federacije BiH", broj 49/06 i 51/09) i ove Odluke.

Član 23.

Do donošenja gradskih propisa ostaju na snazi odredbe općinskih propisa, ukoliko nisu u suprotnosti s odredbama Zakona o Gradu Gradačac i ove Odluke.

Član 24.

Najkasnije u roku od 90 dana od dana stupanja na snagu ove Odluke, izvršiti će se promjene u registrima i drugim aktima nadležnih organa, promjena memoranduma, tabli i pečata, te preduzeti druge radnje neophodne za funkcionisanje Grada.

Član 25.

Danom stupanja na snagu ove Odluke prestaje primjena onih odredbi Statuta Općine Gradačac ("Službeni glasnik Općine Gradačac", broj 4/08, 5/12, 1/17, 5/18 i 8/18) i Odluke o proglašenju Grada Gradačac ("Službeni glasnik Općine Gradačac", broj 1/17) koje su u suprotnosti s odredbama ove Odluke.

Član 26.

Ova Odluka stupa na snagu danom objavljivanja u "Službenom glasniku Grada Gradačac", a objavit će se i na web stranici Grada Gradačac.

**BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
GRAD GRADAČAC
- Gradsko vijeće -**

Broj: 01-05-1/19
Datum: 11.06.2019. god.
Gr a d a č a c

**PREDSJEDAVAJUĆI
GRADSKOG VIJEĆA
Šakić Enir, prof. s.r.**

2.

Na osnovu člana 8. i 13. Zakona o principima lokalne samouprave u Federaciji Bosne i Hercegovine ("Službene novine Federacije Bosne i Hercegovine", broj 49/06 i 51/09), a u vezi sa članom 1. Zakona o Gradu Gradačac ("Službene novine Federacije Bosne i Hercegovine", broj: 30/19) i članom 8. Zakona o pečatu Tuzlanskog kantona ("Službene novine Tuzlanskog kantona" broj 4/99, 7/99, 7/04 i 8/10), Gradsko vijeće Grada Gradačac, na konstituirajućoj sjednici Gradskog vijeća, održanoj 11.06.2019. godine, d o n o s i

**ODLUKU
o pečatu Grada Gradačac**

I OPĆE ODREDBE

**Član 1.
(Predmet Odluke)**

Ovom Odlukom se reguliše statusni značaj pečata Grada Gradačac, zatim se utvrđuje pravo na posjedovanje i korištenje istog, određuje se njegov oblik, veličina i sadržaj te se uređuju izrada, upotreba i čuvanje kao i druga pitanja u vezi pečata Grada Gradačac.

**Član 2.
(Statusni značaj pečata Grada Gradačac)**

- (1) Pečat Grada Gradačac je simbol i obilježje Grada.
- (2) U daljem tekstu ove Odluke kao i u svim budućim dokumentima organa Grada Gradačac (u daljem tekstu: organi Grada), kao i drugih organa, organizacija, komisija, tijela, itd. koji imaju ili steknu pravo na posjedovanje i korištenje, odnosno upotrebu pečata Grada Gradačac (u daljem tekstu: drugi organi), izraz-pojam "pečat" će se pisati i štampati velikim slovima pri čemu će se koristiti samo izraz-pojam PEČAT, što će podrazumijevati da se radi o pečatu Grada Gradačac ako je izrađen i koristi se u skladu s odredbama ove Odluke i važećih propisa kojima se reguliše konkretna materija u daljem tekstu: PEČAT).
- (3) Isti značaj PEČAT će imati i prilikom njegovih usmenih pominjanja ako su vezana za Grad Gradačac i ako ista nisu u suprotnosti s odredbama ove Odluke, zakonskih i podzakonskih propisa, niti su na štetu Grada Gradačac.

**II PRAVO NA POSJEDOVANJE I
KORIŠTENJE PEČATA**

**Član 3.
(Pravo na PEČAT)**

- (1) Pravo na posjedovanje i korištenje, odnosno na upotrebu PEČATA (u daljem tekstu: pravo na PEČAT) imaju organi Grada određeni ovom Odlukom, kao i drugi organi koji to pravo steknu na osnovu odredbi ove Odluke i zakonskih propisa kojima su regulisana konkretna pravna pitanja i mogu ga koristiti samo u skladu s tim odredbama.
- (2) Bilo koja zloupotreba prava na PEČAT i samog PEČATA podliježe svim vrstama sankcija utvrđenih važećim propisima bez obzira na vrstu propisa i nadležnost za njegovo donošenje.
- (3) Pravo na PEČAT imaju sljedeći organi Grada:

- 1) Gradsko vijeće
- 2) Gradonačelnik
- 3) Gradske službe za upravu
- 4) Gradske stručne i druge službe
- 5) Gradske upravne organizacije
- 6) Gradsko pravobranilaštvo
- 7) Gradska izborna komisija

- (4) Pored organa Grada iz prethodnog stava ovog člana, pravo na PEČAT mogu imati i drugi organi ako je propisom o njihovom osnivanju tako određeno i ako je to u skladu s važećim zakonskim propisima i ovom Odlukom.
- (5) U daljem tekstu ove Odluke, kao zajednički naziv za titulare prava na PEČAT iz prethodna dva stava ovog člana, koristit će se izraz- pojam organi iz člana 3. ove Odluke ili samo organi.
- (6) Radna i druga tijela koja osniva Gradsko vijeće koristit će PEČAT Gradskog vijeća, a radna i druga tijela koja osniva Gradonačelnik koristit će PEČAT Gradonačelnika, ako propisom o njihovom osnivanju nije drugačije određeno i ako to nije u suprotnosti s važećim zakonskim propisima.
- (7) Odredbe prethodnog stava ovog člana shodno se odnose i na organe Grada naznačene pod tačkama 3) do 7) u stavu (3) ovog člana.

III OBLIK, VELIČINA I SADRŽAJ PEČATA

**Član 4.
(Oblik i veličina PEČATA)**

- (1) PEČAT je okruglog oblika i prečnika 50 mm.
- (2) Organi iz člana 3. ove Odluke, a radi potvrđivanja službenih i finansijskih iskaznica, karti i drugih dokumenata, mogu imati i PEČAT prečnika 25 mm.

Član 5. (Sadržaj PEČATA)

- (1) Tekst PEČATA je pisan latinicom i ćirilicom u koncentričnim krugovima oko grba koji je u sredini.
- (2) Pečat Grada ima oblik kruga i sadrži tekst: Bosna i Hercegovina – Federacija Bosne i Hercegovine – Tuzlanski kanton – Grad Gradačac i naziv organa koji ga koristi iz člana 3. ove Odluke ispisan u koncentričnim krugovima oko grba Grada s tim da je vanjski tekst ispisan manjim slovima.
- (3) PEČAT dimenzija 25 mm ima istovjetan sadržaj kao i PEČAT dimenzija 50 mm s tim da riječi mogu biti skraćene, ali tako da se iz skraćenog teksta na nedvojbena način može utvrditi kome pripada.

IV IZRADA PEČATA

Član 6. (Broj i vrste PEČATA)

- (1) U pravilu, organi iz člana 3. ove Odluke, mogu imati i koristiti samo jedan PEČAT prečnika 50 mm i jedan PEČAT prečnika 25 mm.
- (2) Ako je zbog organizacije rada neophodno, moguće je posjedovanje i korištenje, odnosno upotreba i više primjeraka PEČATA, koji se označavaju rednim brojevima.
- (3) Pored PEČATA iz stava (2) ovog člana, organi Grada mogu imati i PEČAT za otiske u pečatnom vosku i PEČAT za suhi otisak na određenim službenim aktima, ako to posebnim propisom bude određeno.

Član 7. (Odobravanje izrade PEČATA)

- (1) Izradu PEČATA Rješenjem odobrava gradska služba nadležna za poslove opće uprave i to na osnovu pisanog zahtjeva rukovodioca ili druge ovlaštene osobe organa iz člana 3. ove Odluke, na osnovu posebno obrazloženog pisanog Zahtjeva.
- (2) Rješenje iz prethodnog stava dostavlja se Ministarstvu unutrašnjih poslova Tuzlanskog kantona, odnosno nadležnoj policijskoj upravi.

Član 8. (Izrada PEČATA)

- (1) Izradu PEČATA vrši pečatoreznica izabrana u postupku provedenom po odredbama važećih propisa o javnim nabavkama.
- (2) Izrađene primjerke PEČATA ovlaštena pečatoreznica je obavezna čuvati sve do njihove predaje organima iz člana 3. ove Odluke, a sve matrice kao i neuspjele i probne primjerke odmah uništiti.

Član 9. (Evidencija o PEČATU)

- (1) Evidenciju o svim primjercima PEČATA koji su u upotrebi kod organa iz člana 3. ove Odluke vodi gradska služba nadležna za poslove opće uprave.
- (2) Svaki organ iz člana 3. ove Odluke je obavezan prije početka upotrebe bilo kojeg primjerka PEČATA da isti dostavi službi iz prethodnog stava ovog člana radi uzimanja otiska i uvođenju u knjigu evidencije.
- (3) Dostava iz prethodnog stava ovog člana se vrši uz pisani podnesak u kome treba naznačiti razlog dostave, opis primjeraka PEČATA po njihovom sadržaju, veličini i broju te podatke o osobama koje će biti ovlaštene za rukovanje, upotrebu i čuvanje svakog pojedinog primjerka PEČATA o čemu se prilaže pravosnažno rješenje iz člana 10. stav (2) ove Odluke.

V UPOTREBA I ČUVANJE PEČATA

Član 10. (Rukovanje PEČATOM)

- (1) PEČATOM rukuje, upotrebljava ga i čuva rukovodilac, odnosno predsjedavajući organa.
- (2) PEČATOM može rukovati, upotrebljavati te ga čuvati i službeno lice koje posebnim rješenjem ovlasti rukovodilac, odnosno predsjedavajući tog organa.

Član 11. (Čuvanje PEČATA)

- (1) Svi primjerci PEČATA se moraju čuvati i upotrebljavati tako da se onemogućiti njihova zloupotreba.
- (2) O čuvanje i upotrebi PEČATA gradska služba nadležna za poslove opće uprave će donijeti posebno uputstvo.

Član 12. (Neupotrebljivost i uništavanje PEČATA)

- (1) Ako je zbog istrošenosti ili iz drugih razloga PEČAT postao neupotrebljiv, isti mora biti odmah uništen o čemu se stara rukovodilac, odnosno predsjedavajući organa ili službeno lice ovlašteno za čuvanje ili upotrebu pečata.
- (2) PEČAT se smatra neupotrebljivim zbog istrošenosti ako se iz njegovog otiska jasno ne vidi tekst koji daje otisak PEČATA.
- (3) Uništavanje neupotrebljivih primjeraka PEČATA se vrši na osnovu Rješenja nadležne službe Komisijski, o čemu se sastavlja Zapisnik.

Član 13. (Nestanak PEČATA)

- (1) Rukovodilac, odnosno predsjedavajući organa ili službeno lice ovlašteno za čuvanje i upotrebu PEČATA, dužni su, odmah po saznanju, prijaviti nestanak PEČATA gradskoj službi nadležnoj za poslove opće uprave. Prijava mora biti izvršena u pisanoj formi i sadržavati sve potrebne podatke o PEČATU, vremenu i mjestu zadnje upotrebe, o osobi koja ga je zadnja koristila ili mjestu gdje ga je vidjela, itd.
- (2) Služba za upravu iz prethodnog stava ovog člana, dužna je nestanak PEČATA odmah prijaviti Ministarstvu unutrašnjih poslova Tuzlanskog kantona i objaviti u službenom glasilu Federacije Bosne i Hercegovine.
- (3) Nestali PEČAT se smatra nevažećim od dana oglašavanja, a u slučaju kasnijeg pronalaska isti će biti uništen u skladu sa članom 12. ove Odluke.

VI PRELAZNE I ZAVRŠNE ODREDBE

Član 14. (Zahtjevi i rokovi za njihovo podnošenje)

- (1) Organi iz člana 3. su dužni gradskoj službi nadležnoj za poslove opće uprave, podnijeti pisani zahtjev za odobravanje izrade novog PEČATA spram odredbi ove Odluke.
- (2) Rok za podnošenje zahtjeva iz prethodnog stava ovog člana je 8 (osam) dana od dana stupanja na snagu ove Odluke.
- (3) Po zaduženju PEČATA iz stava 1. i 2. ovog člana, a najkasnije 24 sata, organi iz člana 3. ove Odluke su dužni službi iz stava (1) ovog člana podnijeti i pisani zahtjev za uništenje svih primjeraka pečata izrađenih po prethodnoj, odnosno odluci naznačenoj u članu 15. stav (1) ove Odluke.
- (4) Uz Zahtjev se dostavlja primjerak PEČATA koji se uništava.

Član 15. (Prethodna Odluka)

- (1) Stupanjem na snagu ove Odluke prestaje da važi Odluka o pečatu Općine Gradačac («Službeni glasnik Općine Gradačac», broj 4/98).
- (2) Pečati izrađeni na osnovu Odluke iz prethodnog stava ovog člana, bit će u upotrebi do izrade i preuzimanje primjeraka pečata izrađenog po ovoj Odluci.
- (3) Uništenje dosadašnjih pečata će se izvršiti shodno članu 12. ove Odluke.

Član 16. (Objavljivanje i stupanje na snagu)

Ova Odluka stupa na snagu danom objavljivanja u «Službenom glasniku Grada Gradačac».

**BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
GRAD GRADAČAC
- Gradsko vijeće -**

Broj: 01-05-2/19
Datum: 11.06.2019. god.
G r a d a č a c

PREDSEDAVAJUĆI
GRADSKOG VIJEĆA
Šakić Enir, prof. s.r.